



## **L'internacionalismu como compromisu de la mocedá nacionalista:**

### **Un abellugu pa l'antiglobalización**

Como afitábemos nel primer documentu del Soyáu Alternativu, dende Mocedá d'Izquierda Asturiana>> proponemos un modelu d'Asturies soberana, onde les asturianas y los asturianos seyamos quien a decidir el nuesu futuru en común, escoyíu democráticamente y algamando esto la so máxima espresión na independencia política, económica y social d'esti país si fuere la voluntá del pueblu asturianu.

Asina y con ello, dende'l sentir d'izquierdes, ecoloxista y asturianista que representa mias>> nun podemos dexar de llau de nenguna manera'l nuesu compromisu internacionalista de solidariedá, xusticia social, procuru col mediu ambiente y desendolcu sostenible. D'esti mou, lloñe de tentar de crear nueves llendes coles nueves señes identitaries y culturales y cola nuesa llucha por algamar l'autodetermín pa una Asturies soberana, quixéremos esparde y defender les reivindicaciones de toos y caún de los pueblos y cultures del planeta, amenazaos, cada vegada más, pol fenómenu sangrín de la globalización qu'homoxeiniza too menos los derechos individuales y sociales, too menos la riqueza.

Poru, namás entendemos y queremos una Asturies que nun se dea énte les inxusticies y violaciones del primer col tercer mundu, que nun mire pa otu llau cuando se trate de defender los derechos de los pueblos vecinos (y non tan vecinos) colos que vamos convivir, que nun zarre los güeyos a la hora de condenar los abusos llaborales y la falta de llibertaes sociales en tantos y tantos países (y tan cercanos) y que nun fale hipócritamente de la defensa del mediu ambiente si sigue estrozando ensin xaciu'l planeta.

Nesti sen, nel nuevu marcu qu'habría abrise, en primer llugar, nel conxuntu del estáu, esa Asturies que tamos por facer tien de ser solidaria y trabayar en común colos pueblos qu'anguaño conformen l'estáu español (aragonés, llionés, castellán, gallegu, catalán, andaluz, canariu, estremeñu, vascu, cántabru...) colos que tamos vinculaos histórica,

cultural y xeográficamente en mayor o menor midida pa lluchar por una Europa solidaria de los pueblos. Nun podemos escaecer equí la nuesa responsabilidá directa nel necesariu espozigue socioeconómicu de los países llatinoamericanos (onde tantes y tantos asturianos y asturianas tán y tuvieren) qu'entá viven en condiciones precaries dempués de siglos de dominación y esclavitú hispánica, agora en manes de los Estaos Uníos con total impunidá, asina como tampoco nun habemos escacer la desixencia a España de la so responsabilidá nel conflictu del Sáhara, güei baxo la inxusta soberanía ilegal de Marruecos.

Puntu aparte merez el xenocidiu qu'anguaño tán careciendo los pueblos iraquín, afganu, palestín y agora libanés, tamién esparde dende siempre per África y Asia entero, como resultáu del despotismu desestabilizador de los Estaos Uníos, que sofita mesmo al fundamentalismu sionista como tien sofita al islamismu radical o a caciques locales, según convenga a los sos intereses económicos y de recursos nestos territorios. Pero sedría inxustu nun responsabilizar tamién a los estaos europeos, como ye'l casu del estáu español, que viende, vendió y paez que va seguir vendiendo material bélicu a Israel y a munchos de los dirixentes africanos qu'empleguen a la población civil, n'especial a moces y mozos como nós, p'algamar el control non yá políticu, sinón económicu de los sos países, y que se da, echando la mirada a otu llau a la hora de defender a los pueblos humildaos alreor de tol Planeta.

Pa rematar, perriba de les rocees y torgues que dende munchos sectores de la izquierda centralista se planteguen cuando los nacionalismos periféricos proponemos alternatives, tamién dende la izquierda, en consonancia dafechu col nuesu compromisu internacionalista, creemos en pie fitu que'l nuesu proyeutu abiertu y non escluyente, sinceru y non propagandísticu, constitúi la meyor de les estratexes pa facer frente a los fenómenos agresivos de mundialización, siendo un abellugu afayadizu pa los qu'entá facemos por resistir al ataque del neolliberalismu con un únicu enfotu: que toes y toos falemos, consumamos, pensemos y vivamos d'igual manera y al so gustu.

Porque creemos na unión de tolos pueblos y habitantes del planeta, porque yá valió d'usanos como ferramienta pa facese ricos y poderosos: ¡Otru mundu ye posible!